

**Naqqiut**

(Akissuteqaat 13. oktober 2016 taarserpaa)

**Meeqqat angerlarsimaffiup avataanut inissinneqartartut pillugit angajoqqaanut paaseqatigiiffiunerusumik suleqateqarnissamik, ersarinnerusunillu piunasaqaasiortoqartalernissaanik Naalakkersuisut suliniuteqaqqunissaat pillugu apeqquteqaat aallaavigalugu Inatsisartut oqallinnissaannik siunnersuut. Taamaaliornikkut angerlarsimaffiup qimagutsitaaffiusup nakkutigineqarluni, angajoqqaallu qaninnerusumik suleqatigalugit, angajoqqaanik siunnersuineq, katsorsaaneq allanillu angerlarsimaffiup pitsanngoriaateqarfiusumik meeqqanut angerlarsimaffimmiit qimagutsitaasimasunut piaarnerusumik angerlartitseqqinnissaq anguneqarsinnaaqqullugu.**

(Inatsisartunut ilaasorta, Anthon Frederiksen, Partii Naleraq)

**Akissuteqaat**

(Isumaginninnermut Ilaqutariinnermut Naligiisitaanermut Inatsisinillu atortitsinnermut Naalakkersuisoqarsoq)

Inatsisartunut ilaasorta Anthon Frederiksen oqallisissiamut pingaarutilimmut qaqitsininnut qujanaq.

Meeqqat inuusuttullu tatiginnillutik imminullu naleqartillutik misiginissaanni, siunissamilu angusarerusutanik takorluukkanillu angorusutanik piviusunngortitsinissani inerisaanissanilu inuttullu piginnaanngorsarnissani pinngitsoorani siullertullu meeqqat inuusuttullu angajoqqaani tunniusimasuni uummaarissuni isumassuisunilu peroriartorfeqarnissaq siullertut tunngavissinneqartariaqarput aallaavissinneqarlutillu.

Ilaqutariit meeqqanik sumiginnaasut kinguaariit kingornuttagaannillu pitsaanngitsunik kinguaariit kingornussisarnerisa kipitinneqarnissaani ikiorsiissutissanik ikorfartuinernillu pitsaanerusunik suleriuseqarluni suliassanik kivitsisariaqarneq Naalakkersuisut isumaqatigilluinnarpaat.

Siamasissumik immikkullu ittunik periutsinik atuilluni ilaqutariinnut sumiginnaasunut neqeroruteqartalernissat pilersinneqarnissaat pingaaruteqarpoq, tamatumani meeqqat ineriartornissaani alliarternissaanilu atugarissaartinneqarlutik inuuneqartinneqarnissaani angajoqqaat piginnaasaanik sukumiisumik aallussinissaq pingaaruteqarpoq. Ilaqutariit sumiginnaaffiusut ilitersorneqarnissaanni, siunnersorneqarnissaanni ikiuiffigineqarnissaanilu Ilaqutariinnut Sullissiviit qitiusumik inissimasinnaapput, soorluttaaq atorerluinermik katsorsarneqarneq sunniuteqarluartoq toqqammaviusariaqartoq.

Ajoraluartumik inuiaqatigiinni angajoqqaarpoq meeqqami atugarissaarlutik inuuneqartinneqarnissaani ineriartortinneqarnissaanilu naammaginartumik paaqqutarinnissinnaanngitsunik. Amerlanertigut angajoqqaat sumiginnaasut taakkuukkajupput nammineerlutik meeraanerminni persuttarneqarnermik kinguaassiutitigut atorerlunneqarnermik imaluunniit allatigut sumiginnagaasimanermik atugaqartinneqarsimasut. Taamaattumillu inersimasunik meeraanerminni kinguaassiutitigut

atornerlunneqarsimallutik kingunerlutsitsisunut katsorsaanerit immikkut ittumik aallartissimallugit.

Meeqqat pisariaqartitaat aallaavigalugit ilaatigooriarluta allatut ajornartumik meeqqat angajoqqaarsiani aammalu ulloq unnuarlu paaqqinnittarfinni inissittariaqartarlugit, tamatumani iliuuseqartoqangippat meeqqat peroriartornerminni atugassarititat aqqusaartugaat timikkut tarnikkullu ajorluinnartunik kinguneqarsinnaasarmata. Inuiaqatigiittut pisussaaffeqarpugut iliuuseqassalluta pingaaruteqarporlu aamma iliuuserisatsinni pitsaannerusunik inisseeriaatsinik pilersitsissalluta.

Meeqqat tamarmik angajoqqaaminnut angerlarteqqinneqarsinnaaneri Naalakkersuisunit ilimanartutut isiginngilarput. Meeqqalli angajoqqaaminni peroriartortikkusunnarnerusarput. Taamaammallu angajoqqaat sumiginnaasut ikorfartorneqartuarnissaat Naalakkersuisunit suliniutigiussavarput, tamatumani angerlarsimaffiup avataani inissiisarnerit pinaveersimatinneqarnissaani suliteqarnikkut, aammalu suliniutigineqassaaq sapinngisamik meeqqat angerlarsimaffiup avataanut inissinneqartartut akornani meeqqat amerlanerpaat angajoqqaaminnut angerlarteqqinneqarnissaat anguniarneqartuarnissaa.

Angajoqqaat meeqqaminnik sumiginnaasartut ulluinnarni suliniuteqarfigineqarnerini akisussaaffik kommuuninut tunniunneqarnikuuvoq. Ukiuni kingullerni ajoraluartumik misissuinerit takutippaat kommuunini ilaqutariinnut angajoqqaanullu meeqqanik sumiginnaasartunut ikorfartuinerit naammaginaturnik kivinneqarsimangitsut.

Kommuunit suleqatigalugit suliassami pingaaruteqarluinnartumik kivitsisinnaalersittariaqarpagut. Kommuunini ilaqutariit angajoqqaallu meeqqanik sumiginnaasartunik suliniuteqarneri ingerlalluanngippata ajoraluartumik angerlarsimaffiup avataanut inissiisarnerit piffissaq ungasinnerusoq isigalugu annertusiartuinnassaaq tamannalu kissaatiginangilaq.

Ilaqutariinnermut suliassaqarfiup nukittorsarneqarnissaata saniatigut sullissisut isumaginnittullu ataasiakkaarlutik sulinerminni atugassaqartinneqarneri Naalakkersuisut immikkut aallutassarisaasa ilagaat. Nalunaarusiat takutippaat sullissisut isumaginnittullu suliassanik ima amerlatigisunik tigummiqartinneqartartut allaat suliassani tamani pitsaasumik tapersersuilluartumillu siunnersuinissat suliarinissaanut ajornakusoortittaraat.

Naalakkersuisut ukiuni tulliuttuni pingaarnertut salliullugit suliassaasa ilagaat kommuunini suliassat amerlassusilerneqarneri misissuivigineqarlutik takussutissinneqarnissaat, tamatumani sullissisut isumaginnittullu meeqqanik ilaqutariinnillu sumiginnaasunik sullissisuttatta naammaginaturnik sullissinerminni atugassaqartinneqarnissaanik toqqammaviliinissat.

Oqaaseqaatigineqartut aallaavigalugit Inatsisartut oqallilluaqquneqarput.